

Narodni list<sup>14</sup> izlazi svakoga četvrtka po pođne.

Na mu je na godinu 6 kruna, na se-  
bako 4 kruna, pojedini broj 4 helera.

Redništvo i uprava lista nalaze se u  
Voloskom kbr. 8.

# Narodni list

Za oglase plaća se 10 helera po redku,  
za više puta po pogodbi.

Oglasi šljuz se na g. Rađe pl. Marochino  
u Opatiji.

Rukopisi se ne vraćaju. — Nefrankirani  
listovi se ne primaju.

Pučki list za politiku i pouku.

„Narod bez narodnosti jest tielo bezkosti!“

Br. 4.

Volosko-Opatija u četvrtak 13. prosinca 1900.

God. I.

## Za ča su jedanput naši stari krv levali?

Leta 1866 imel je naš Cesar vojsku  
s Prusijani i puno našeh soldati je bilo  
pozvano zgoru va Pemsku, da naše ce-  
sarstvo obrane suprot Nemca. Kada su  
Talijani videli, va kakoveh neprilikah  
se nahaja naše cesarstvo, i kada su vi-  
deli, da su dolaji kraji puli mora brez  
obrane, skočili su na nogi, da na tra-  
diment pograbe našem cesaru Beneci,  
Istru i Dalmaciju. Nego Talijani su  
slabo računali, kada su misleli, da bi  
naši ljudi mogli mirnim okom gledat  
propast zemlji va koj su se rodili. I ti  
naši ljudi, ti dični naši otei i dedi, raz-  
delili su se na dva dela; jedan del ih  
je šal va Italiju i pul Kustoci razbili  
i potukli talijansku vojsku od kraja,  
dokle se je drugi del pod Tegetofom  
ukreal na naši brodi od gveri i zaletel  
se dele pod Vis.

A kada su Talijani videli naše  
Istrane i Dalmatince, kako gredu proti  
njim, počeli su im se smet i rugat i  
već su sigurni bili zet nam Istru i Dal-  
maciju. A i Talijani va Capodistrie, va  
Pirane, Poreče, Rovinje i Labine držali  
su već va peste, da te od hipa do hipa  
spast pod Taliju. Ma koliko jedni, to-  
liko su se i drugi prevarili va svojeh  
računeh. Naši dični Istrani i Dalmatinci,  
svi su ti ljudi našega hrvatskega jezika  
valje videli, kakova njim nesreća proti  
i zato su se dobro držali i tvrdo su se  
držali ti naši stari junaci i puno Ta-  
lijani potopili, a oni ki su ostali živi,  
moral su bežat kako poplašeni zeci.  
I našeh je palo, puno njih je izgubilo  
život, puno je udovic zaplakalo, puno

se mater va crno zavilo, puno je sestar  
ostalo prez brata, a divojak prez svo-  
jega mladega, ma na to ni nijedan ni  
mislal, glavno i prvo je bilo to, da  
sebe i dobremu našem cesaru očuvaju  
ovi lepi kraji Dalmaciju i Istru našu.  
Za to su i naši stari tekli va vojsku  
veselo i prez straha, zač su znali, da  
je blagoslovljen svaki kap krvi, ča ju  
proleju za svoje ognjišće proti grabež-  
ljivemu Talijanu.

A danas?

Ah! da je onem našem starem  
dedom kakogod ustaz za groba, da moru  
videt ča se danas dogadja — oni bi  
sigurno od tugi i velike žalosti počeleli,  
da se nazad skriju va crnu zemlju, da  
ne vide toliku sramot, kade jedan Ru-  
kavčan, jedan Leprinčan, jedan Lo-  
vranač i jedan Mošćeničan za zmuj vina  
i par krajcari prodavaju Talijanu onu  
zemlju, za ku su ti stari dedi i oci naši  
pred trejset i čitire leta krv svoju pro-  
leli. Ja, i propakali bi ti naši slavni  
dedi, kada bi videli tu velu sramot i  
zdañnuli bi: Oj ti naše nekadanje lepo  
i zlato poštenje kamo si nam šlo, oj  
naša slavna krv, nač si se obrnula!  
A ovako neka zahvale Bogu da im oči  
mrak pokriva, da ne vide Rukavčane  
i njihovu nesrećnu, izgublenu braću,  
kade va žmulje vina utapljaju svoju  
čast, svoje poštenje. More jedan narod  
niže past, nego su to spali oni naši  
vanjšćaki, ki su ovi dni dali svoj glas  
onem fiduciarom, ki te svoj glas dat  
Talijanu Bennati, onemu Bennati, ki je  
pred stotinami Talijani na vas glas  
rekal i to pod nos zastupniku našega  
austrijskega governa, da Talijani va  
Istre imaju za rameni trejset milijuni

Talijani z Italije, ki te im do potrebi  
na pomoć skočiti.

A sada? Lisa i Bennati. Slava, dika  
i junačtvo s jedne strani — a kukav-  
ščina, poruga i pogrda s druge strani.

Sramota, sramota i sramota!

Nije nam ni za 10 ni za 15 fidu-  
ciari ke bimo mogli dobit ale zgubit,  
već nam je do našega nesrećnega puca,  
ki je već tako nisko pal, da za žmulj  
vina prodava onu zemlju, ku su naši  
dedi čuvali prolevajuć svoju krv. Strašno  
je to — to je znak da narod propada,  
da narod sam sebe pogubljuje.

Pred trejset i čitire leta, al sada!  
Svetli dan i crna noć. Čast i pro-  
kletstvo, junačka sreća i crna propast.  
Oj puče naš, kamo si nam zašal, na  
kakov krivi put si se dal zapeljat od  
izroda, od plaćenega izdajice, od ljud-  
skega smeta, ki je rojen za sohi, a ne  
za ljudsko društvo!

Nego puče naš, ja ki ti ovo pišem,  
nisam još zgubil svu veru i svaku nađu,  
ja još držim, da ćeš se sopet vrnut na  
pravi put, da ćeš progledat i spoznat  
strašne i pogubne laži, s kojimi ti raz-  
bojnici tvojga imena i pošćenja kvare  
i pamet i dušu, a i ono dobro srce, ko  
su ti pustili oni tvoji dični stari, ki su  
drugučije branili svoju čast. I ja ti  
praščam, a molim i Boga da ti i on  
oprosti, zač ne znaš koliko zlo i koliko  
sramot si storil sebe i onem, ki počivaju  
va grobeh, kade im se od tvojega stra-  
šnega dela kosti prevračaju.

## Pogled na izbore za bečki par- lamenat u kotaru Voloskom.

Izbiri za bečki parlamenat počeli  
su u ovom kapetanatu na 26. novembra  
u občini Podgrad, gdje je taj dan u  
sekcijah Vele Mune i Hrušica bilo iza-  
brano jednoglasno za petu kuriju 8 fidu-  
cijara naše istarske hrvatsko-slovenske  
stranke. Na 28. novembra zibrala je  
sekcija Podgrad jednoglasno 4, a sekcija  
Materija 11 naših fiducijara za petu ku-  
riju. Dan za tim, t. j. na 29. novembra  
bilo je u Materijah izabrano jednoglasno  
11 naših fiducijara za četvrtu kuriju,  
a u Jelšanah opet 8 fiducijara naše  
stranke za petu i četvrtu kuriju. U sle-  
dećih dnevih bila su u Pregarju iza-  
brana 2 naša fiducijara za petu kuriju,  
a u Podgradu 15 naših za četvrtu ku-  
riju. Občina Lovran izabrala je na 5.  
ovoga meseca 6 fiducijari talijanske  
stranke za petu kuriju, a 4 fiducijara  
talijanske stranke za četvrtu kuriju.  
Občina Veprinac izabrala je po 4 fidu-  
cijara talijanske stranke za petu i za  
četvrtu kuriju. Občina Kastav izabrala  
je u Kastvu, Sv. Mateju i Klani 27  
fiducijara naše stranke za petu kuriju,  
a u Beličih, Sv. Mateju, Klani 26 naših  
fiducijara za četvrtu kuriju. U sekciji  
Rukavac bili su izabrani talijanski fidu-  
cjari 6 na broju za petu, dočim je za  
četvrtu kuriju bilo zibrano 6 naših fidu-  
cijara. Isto tako bili su zibrani fiduci-  
jari talijanske stranke, 6 na broju, u  
Mošćenicah. U Voloskom bilo je zibrano  
5 fiducijara naše stranke za petu ku-  
riju, a u Opatiji 3 za četvrtu kuriju.

U svemu bilo je u ovom kapitanatu  
izabrano za petu kuriju 65 fiducijara

## PODLISTAK.

### Lovranske pačuharije.

Neki dan je bila va Lovrane jedna  
stara Stroliga. Puno je ljudi k njoj pohajalo,  
pak je k njoj šla i sva fameja in corpore,  
da i njoj sredicu pove. Najprvi se je pre-  
zentiral Blejamin. Stroliga ga je čapala za  
ruku, pogledala ga dobro v oči i rekla mu:

Vas čeka va Lovrane jedna vela čast,  
od ke ćete se tako razdebelit, da ćete morat  
nekoliko puti poč va Padovni salo znimat.  
A bilo bi tega još i više, da nimate va Lo-  
vrane Hrvati, oni Vas muče i jade; ma kada  
njih ne bude, kada ih budete spedit preko  
mosta, onputa šli, da ćete se od veselja raz-  
debelit kako jedan — da mi prostite —  
taneki, tako da ćete od silne debeljini puknut.

Za tim je prišal Jorje. Stroliga ga je  
malo popipala za ruku i nekako sva proble-  
dela od velega čuda i rekla:

Ča ja vidim? pogledajte ovu žilicu, znate  
ča ona šinjilka? Ona šinjilka, da ste Vi  
proklet, zač da ste se jedanput krivo zaklel.

Spametite se, ako ste se kadagod krivo  
zaklel. Jorje se je tresal kako veja, i rekla:  
Ja, ja, ja sam se krivo zaklel, jedanput sam  
se va podeštarije dignul i rekla sam pred  
svemi rasprezentanti: Ja prisegujem na Boga  
svemogućega, da ja hrvatski ne razumem.  
I ta sam se, sad vidim, krivo zaklel. A stroliga  
njemu: Hote valje kapucinom v Reku,  
neka Vas blagoslove i delajte pokoru —  
Bog je milostiv — on bi Vam mogal još i  
oprosti. A Jorje njoj: Ču poč, ču poč, samo  
mi malo vi recite, ako bi mane mogal još  
narast kakov muzol na glave. A stroliga  
njemu! Ne bojte se Vi za to, da bi sve ote-  
l, nima mesta, glava Vam je već okupana,  
a kade bite ote- l da Vam drugde naraste!

Na to je prišal Pikaroba. Celu urn mu  
je pipala ruku, dokle je našla jednu modru  
žilicu, va ku je ona puno vremena gledala i  
najzad rekla: Ja dragi moj, Vi bite morali  
još jedanput storit jedna dobru operaciju  
A zač to? je pital Pikaroba. A zato, rekla  
je stroliga, da Vam spuste vanka svu onu  
kranjaku krv, ku Vam još tače po žilah. Još  
je, dragi moj, te kranjske krvi nutre još, i  
to više nego mislite, i znajte, da doklegod

je bude nutre jedan jedini kapić, dotle će  
se zvat trubilo svaki, ki Vam bude rekla da  
ste Taljan.

Onputa je prišal Kukuma na red. I  
njega je čapala za ruku, kako sveh drugeh  
ma ju je valje stegnula i rekla: Ja, dragi  
moj, Vaša ruka je tako kosmata, da ja ne  
bim mogla nač one žilice, ka mi je za po-  
trebu. Dunke obrijte tega vruga, ako ćete,  
da Vam sredicu pove. Onputa su pnesli  
jedan bokun sapuna grezega, s kem se luži,  
i jednu debelu britvinnu, pak udri raskat onu  
nespodobu. Na tleh se je pak nakupilo toliko  
one vuni, da se je Burina, ka je jušto na  
to prišla bila, prignula i pobrala svu vunu  
i rekla: Ču ovo pobrat, jušto će mi operat  
za donaplest Jorjotove Kalceci. Onputa mu  
je stroliga sopet zela ruku i počela mu je  
razgledavat žili. I rekla mu je: Vidite ovu  
žilicu, ka se je svila kako lumer 6, znate Vi  
ča ona šinjilka? A Kukuma njoj je odgo-  
voril: A znam, lumer 6 šinjilkuje: que sta  
sera t'attendo. — Dobro je, rekla je  
stroliga, a znate pak Vi, ča govori ova druga  
žilica, ka je zavintu kako lumer 9. A znam,  
rekal je Kukuma, to će rač: dietro ka-

pelica. A ova treća žilica, ka je storena  
kako lumer zero? A Kukuma: He, he, he,  
— i to znam ča šinjilkuje, he, he, he! ma  
ne ču povedet — he, he! Pustimo to, raje  
mi povejte sredicu. — Čete, da Vam sredicu  
povem? Benj, Vaša srećica je to, da ima va  
Lovrane još nekoliko bedastih ljudi, ki Vam  
veruju — zač da ni tega, Vi bite leteli  
zgoru kopiti va Kranjsku, od kuda ste i  
prišal. Druga pak srećica Vam je Vaš sin  
— verujte mi, da kaže lepo — el prometite  
molto — samo jedno Vam preporučujem:  
Oženite ga, ale ga pak držite dugo od teti.

Onputa je pristupil Krstić, ki je jušto  
ta dal bil va Lovrane. Kad je strolige ruku  
daval, stroliga se je od njega ča obrnula i  
rekla: O to pak ne — Vi niste dostojan  
tega, da Vam ja ruku taknem, ča od mane  
— Vi ste svoju zakonitu ženu prevaril —  
marš ča. I Krstić je moral poč ča, a da ni  
niš opravil.

Kada bi kigod rekla, da su va Lovrane  
Talijani! Ma kakovi su to vratji Talijani,  
kada moraju hrvatski mislet, ako te talijanski  
govorit. To će Vam posvedočiti i ov list, ča





